

Transkription von Urkunde HST 1317c

Ort, Datierung: Stralsund, 1317-06-02

Signatur: Stadtarchiv Hansestadt Stralsund, StU 0132 [\[online\]](#)

Inhalt: Witzlaf tu Ruyen: Friedensbündnis

we witzlaf vorste tu Ruyen van der gnade godes bekennet openbare an desser scrift vnde dūt witlich allen luden , de nu sint vnde / noch tukomen scolē , dat we mit gudeme willen vnde mit ganseme rade vnde vūlbort vnser truwen ratgheuen , mit vnser leuen / leuen ratmannen , vnde oldermannen vnde mit den meynen borgheren tome stralessunde ghedeghedinghet hebben alse hir na screuen / steyt , dat alle twidracht vientscap vnde vordachtnize de twischen vns vnde en ghewesen heuet wor van wanne vnde wor de gheschen / sin dat de tomale vnde gansliken is gheliket vorsunet vorgheten vnde tū rugghe gheleghet , also dat se scolē bliuen bi al erer rechte= / heyt unde vriheyt de se van olders hebbet ghehat vnde al ere hantfestinghe de se van vns vnde van al vnser voruarn hebben de scole wi / en holden stede vnde nicht breken vnde wat de borghere mit vnser breuen vnde mit unser manne breuen moghen bewisen dat scole we / vnde vnse man en holden vullenkomeliken . Och late wi van allen breuen de we van der stat hebben vortmer scole we de borghere / van deme sunde weder wisen vnde weldeghe inere goyt wor se it hebben in vnse lande mit ghenaden vnde mit vrede tū besittende / vortmer so laten desse vorbenumeden borghere mit ghudeme willen van der ansprake des huses tu perun vnde des dorpes to parowe . / also . dat we vnde vnse erfnamen dat besitten scolē bi dessen vorsproken dinghen scal it yō bliuen vnde en stede sone wesen . To ener betughinghe desser dinghe so hebbe we en dessen bref ghegheuen beseghelet mit vnseme Ingheseghele De tughe de hir ouer sin ghe= / wesen de heren her Johan van Gristowe , her hinrik van Dechowe , her Siuert van plone , her Johan van deme bughe , her Johan Dotenberch , her hinrich bukeman , her Ernest van deme hoykenhaghen . her hinrich vnde her borchart van der Osten riddere , / her Nycolaus van Starcowe pleban to Barth vnde her albrecht pleban to gartze vnde cappelane , Dit is ghescheyn oppe deme rat= / huse to deme stralessunde dar ouer sin ghewesen de menen ratmanne vnde olderman dar sulues na der bort godes . dusent iar . drehun= / dert iar indeme seunteyn den iare in deme daghe des hilghen lichamen godes